

IBURU KEKÁ MA UVAMAN AMEIN BOMPON MINO

(Iburu)

Iburu Vompon Ma Uvanteí Pákenai Afova Vaya Ino

Ma vompon ma uvantein banta ino.

Ída mana ano afová ukhen mino. Ma vompon ma uvantein banta maen Timotin arona váken Tiyarafenui Feyante Vompon Dóki Kayo afová ukhein manon uvanten mino.

Uvarein orana ino.

Yutan kayo vá Romú kamanin mái aruvín ída araí ukhan AD sikisti-faipi (65) fin mi uvanten mino. Yutan kékái aruvín ma AD sikisti-sikisi (66) ráké seventi-tari (73) rá ma mo kípein aruvín ída araí ukhan inká Yerusaremí kákan baru vá dere ída aren taren ira saman kaúkan mi ma vompon uvanten mino.

Ma vompon ma uvantein baru ino.

Romú barurá ino sen iniyán mifo o siádan baya ano siyáken Itarí barafin ne sikhen mino. (Iburu 13:24 fin ná onano.)

Ma vompon ma uvaman amikhein kéká ino.

Yutan kéká pinté ma sanáa ano Yisasintá monó tiyan mumunan iyákan ma Iburu kéká ino siyan ma vompon uvaran banta ano afová ukhan ma mana akhempá baré ein kayon uvaman amikhen mino. Mai kayo van Yerusaremí baren ne sen iniyán mifo manáa ano siyáken Areksandriá se sen Korini se sen Efesasi se sen inká Romu se sen iyan mino. Esé araí in táké Karaisintá mumunan nan betin aren asen iyákan mai ma araí in táké ma ákonaen eriyá ein avúavá me ampiren Yutan kayoi ara ara kampun afova ánain bákurirí iyaimpin mi ma vompon uvaman amen mino.

Nái ana vará ma vompon uvanten nafino.

Yutan anan pinté ma Yisasintá monó tiyan mumunan iyain kékái aní iyáken Yisasini ákona anon man baya vá sakhanampa kéká báí vaya vá esantakhen ne sen aní iyáken mi sian amá ukhen mino.

Tiyarafenu Anin Mano Ma Enisori Kayo Esantakhein Baya Ino

1 ¹Pefá Tiyarafenu ano kokhon dádái ara ara aa sáké uaren mi sakhanampa vanta kayo oo ráké tetin tinafu siráon baya siamikharen mino. ²“Máan tukhan mifo ma vara kípán damú ádesí iyan mi ve Anin pinté uaren tétin tisimikhen mino. Tiyarafenu ano ve anin pinté uaren bara vá inaru vá inká minó danasinta vá uváden bérin iyáantákaren mi minó bei yanasinta mai iyampon amikhen mino. ³^bMáan tukhan mai iyampon mano Tiyarafenui kakhan aúpin mi váken minó bérin ma variyain avúavá máan aní iyan mino. Bei ákona vaya fókéi ma varafin ma vain danasinta ákona uanté iyan mino. Tetinti ume sesé uré avusese usintano van ma e fúaren mantaven mai oyampákéi ve afóen ayan kuompá ma vain Kin karáká inarufá un kumamen kákan bí baren mino. ⁴“Máan ma ein avúavá anon aníen mi ve Anin manon enisori kayo esantakhan betí ankan ben aránaópái van mino. Mai ma Tiyarafenu ano enisori kayo esantakhe ne siren amikhá ein bí an den enisori kayo aví esantakhen mino.

⁵“Mai van mi Tiyarafenu ano Yisas Karaisin nan ma máa sikharé ein baya mai ída mana enisori van tikhen mino.

“Éi sen tanin baná

taréa en afóení é uno,”

Íbo 2:7

Inká Tiyarafenu ano evaránen máa sikhen mino.

“Téi ven afóení ékun

inká bérin sen taniní inten mino.”

2Sa 7:14; 1Kr 17:13

⁶“Máa sikharen Tiyarafenu ano ve anin eséke iyampon ma aviren barará nanin banta ma me amusin amiren maen evaránen máa sen mino.

“Áesin ná Tiyarafenui enisori kayo ano véintá ana vá monó tino.”

Diu 32:43

⁷Mai van mi Tiyarafenu ano vei enisori kayo van máan mi sikhen mino,

“Uva an den

inká ira anamuná ma ein an den ukhen mino.”

Íbo 104:4

⁸Máan té iyan mifo ve Anin máan mi sen tiamen mino,

“Tiyarafenu oe, eni yafisin ákona ano fara van oriyan banten mino.

^a 1:2 Yon 1:3 ^b 1:3 Yon 14:9; Kor 1:20; Ibu 8:1 ^c 1:4 Fir 2:9 ^d 1:5 Apo 13:33

^e 1:6 Rom 8:29

- Eni funtákein avúavá anon banasirá kama yafisirí inten mino.
⁹ Funtákein avúava san manan éi anunu ureyan namu avúava san afon karíen nan,
 Mai van mi Séi eni Ayarafenun báké éin avidéi ena kheká esantaré dan uron kaúdé
 amusin uverifó en ánompin bana é uno.” *Íbo 45:6-7*
- ¹⁰ Inká evaránen máa sikhén mí,
 “Bafan noe, esé araíintá ma ma vara uvarano van inikharé eona, mai ayontá ma vain danasinta en ayan afun mi van mino.
¹¹ Mai yanasinta ano o khípanten mifo éi fara va oriya van nono.
 Mai yanasinta ano feyante vuí daná ma kafá kafá einíi inten mino.
¹² Peyante vuí daná ma yádá einíi eyan mai yanasinta yádain nono.
 Mai yanasinta ano feyante vuí daná ma kafá kafá einíi inten mifo
 éi mai ma vanonará para váke
 ída ayokhuvíní inono.” *Íbo 102:25-27*
- ¹³ Tiyarafenu ano ída mana enisori van be anin nan ma máa seiní ukhen mino,
 “Ten tiyan kurompá kumantesirá
 eni namuro kayo maman bararasí uré
 en arantan kain karasí uantano.” *Íbo 110:1*
- ¹⁴ ^fMáa sikhén mifo enisori kayo mai yoran banta máan ban mino.
 Tiyarafenu ano ma evaránen aviran nain kékáká ma yafíken aya inain aunan kayon bákan mi siantan erikhen mino.

Kama Vaya Ma Oyan Amiyaren Ma Uman Baran Nain Baya Ino

2 ¹ Máan tukhein nan mi setí ankan ma mumunan iyá tiferuna me ampen nampo mai ma funtákein baya ma sisimí iné tiferuna rasá dafían ákona ó tifano. ² ^g Para vara seyo, Tiyarafenu ano ma enisori kayo oo ráké uaren ma sikhá ein mai fura vaya kayon bákan banasi ano ma mai vaya átakharé uren ída yakhafein kéká ano uman bariyaren mino. ³ ^h Máan tiyaréin mi setin ma evaránen tiviran baya ma Bafan mano sian dákó uran ma inikhá ein kéká anon puran tino sen tetin tisimiyán mino. Mai ma setin ma evaránen tivíkein baya ma átakharé onté mai intesá uré karan oró tifante rafuno.
⁴ ⁱ Tiyarafenu ano enará ukhein avúavá bá inká aní daná kayo vá pói aní iyáken maen inká bei anunu fintéi Kantá Aunan amusin amídú ukhen mino.

^f 1:14 Íbo 34:7; 91:11 ^g 2:2 Kar 3:19 ^h 2:3 Ibu 10:29; 12:25 ⁱ 2:4 Mak 16:20; 1Ko 12:4, 11

**Yisasi Ma Uman Baren Purein Manon Ma
Setin Evaránen Tivíkein Baya Ino**

⁵Mai ma ínaimpá erin nain bara van ma siyá tiferunará enisori kayo ano ída yafisinten mino. ⁶Máan tinten mifo Tiyarafenui bompon dókifin máa sikhen mino.

“Inte anarasá banasi van iniya vákeya,
inká pará banasirá dafisiyá ba fono.

⁷Manáarái véin maman enisori kayo aránaópá denan baré iyan,
kákan bí bá kakhan má póké béin kamamosí uantádeya,

⁸ minó daná ben aránaópá kae ono.” *Íbo 8:4-6*

Tiyarafenu ano minó daná maman ben aránaópá kaúdan beni yafisin akhempá mana yaná ano ída van mifo saréa ma oné tifékun maen mai yanasinta ano ven aránaópá ída van mino. ⁹Máan tukhen mifo Yisasin ma maman enisori kayo aránaópá dan ma manáa rá baré íkan ma Tiyarafenu ano kákan bí bá kakhan má pó ma véin kini kamamosí uantákein mi oniyá tiféuno. Mai fara va ino. Tiyarafenui sarisari áupin mi Yisas Karaisi ano ma vara ráke nanin bantai ara ara uman baren púbín mino.

¹⁰Mai ma minó daná uváden maman dan ma kamaen doriyain Tiyarafenu ano funtákein avúavá baren mi kokhon nanin banta avíden béi ma kákan bí manteinífen betin amen mino. Yisasin ma uman bareintái Tiyarafenu ano vanasi aya uren evaránen avían kakhantá kaen mino.

¹¹^kMáan tukhein nan mi Yisas Karaisin má inká mai ma maman kantasí uantákein kéká bá Afóe mai mana anan ban mino. Mai ana van mi Yisas Karaisi ída ayave van inton kasaen te sun tifá kayo ino sen ariyan mino.

¹²Mai van mi Tiyarafenui vompon dókifin béi máa sikhen mino.

Te sun tifá tiváeyan avorá eni kákan bí tian dákó onté uno,
monó nanin banta avorá í diyáké en aví daní onté uno.” *Íbo 22:22*

¹³Máa siren evaránen temí,

Tiyarafenurá anan tesi inin kaonté uno,” *Ais 8:17*

siren evaránen temí,

“Tiyarafenu ano ma simein iyampon kayo vá masi vá uno.” *Ais 8:18*

**Yisasini Furin Mano Ma Ban Anoni Ákona
Maman Bararasí Ukhein Baya Ino**

¹⁴^lTiyarafenu akhafana mai amasi vá nare vápói uvantein pasen Yisas Karaisi yere mai avúavápin mi yorun afoká uven mai vukhafa vái varen mino. Barará banta an daven ma véi furein manon purini ákona ma fákakhá ein Ban Anoni ákona maman bararasíen mino. ¹⁵Yisas Karaisi

^j 2:9 Fir 2:8-9 ^k 2:11 Mat 25:40 ^l 2:14 1Yn 3:8; Rev 12:10

ma mai avúavási ein manon mai ma furini akhokho ano ma vanasi yamuádan báken ma veni miyan ída varan doran nanin bantaí ma ukharé ein mi útúanten mino. ¹⁶Para vara seyo, enisori kayo aya ono vara véi eren naifo, Abaraamun anavasin aya ono van mi erikhá mai afová ukhé tiféuno. ¹⁷Máan ma ein manon tetin maman be aun afasí uren mi Ti yarafenu avorá tarisari vá puntákein monó ánon banta kékái ánon bantaí uven béin íkun uan amintin banasii ume ampiantanten mino. ¹⁸Akhenókain uman béi varen afová ukhein pasen mai uman ma varan nain kéká kasaen aya inten mino.

Yisasi Ma Mosesin Esantakhein Baya Ino

3 ¹Máan tukhein nará kantasí ukheona sifá tiváeyan má tiyó má bá ano ma inarufá orono van iyaona kéká ano vá ineno. Ti yarafenui vava varen orin banta Yisasi ma monó ánon banta kayoi ánon bantaí ukhen mino ma siyáeruna vará ineno. ²Mai fara vara seyo, Mosesi ma Ti yarafenu oo yaiyen puntáken beni vanasirá dafká ein an mi yen Karaisi ano mai ma véin aní uren tiantan erikhá ein Ti yarafenu oo yaiyen puntáden doren mino. ³Mana vanta ano ma kama ukhein namun uváden maen mai vanta anon kákan bí baré iyan mifo mai namun mano ída kákan bí baré iyan mino. Máan manan en mi Yisasi anon Mosesin esantaren kákan bí baren mino. ⁴Mai fara vara seyo, mana mana namun ma vain mai mana mana vanta anon uvanten mifo Ti yarafenu anon minó danasinta uvanten mino.

⁵Mosesi ano Ti yarafenui yoran bantaí ukhen mi véin oo yaiyen puntáden beni vanasirá dafíken maen inká ínaimpáké ma Ti yarafenu ano fura vava ma maman dákó inain avúavái aman manon an mi yakharen mino. ⁶Máan tiyaren mifo Ti yarafenun Anin Yisas Karaisi anon ben oo yaiyen puntáden báken ben amáká dafíken mino. Máan tukháí mai ma Karaisi ano e siviran nain nan ma simusin iyáké ákonaé ave ukhé tiferuna kéká ano ven amá an mi yakhé tiféuno.

Ída Ma Ará Baeran Nain Kéká Ano Ma Uman Baran Nain Nan Ma Amaan Baya Sein Mino

⁷Máan tukhein nan mi Kantá Aunan mano máa siyan mino, Taréa vá beni vava ineno.

⁸°Mai ma kámá barafá ma vanasi ano Ti yarafenui vava átakharé uren,
béin akhenóka uan oniyá ein an deya ída vá tiretíí ará pákaan ákona ono.

^m 3:1-2 Nam 12:7; Ibu 4:14; 7:26 ⁿ 3:5 Nam 12:7; Diu 18:15-19 ^o 3:8 Eks 17:7; Nam 20:2-5

⁹ Tiretí ankan anáuyan mai foti (40) oranarái enará ukhein daná aní ékun oniyáken mifo
séin akhenóka uan oniyaren mino.

¹⁰ Máan tiyaimpin betin nan tiran nan uantádé máa sé uno,
‘Minó damú téi ma siameruna vaya me oyan amiren maen
ída sen too yaiyiyan mino.’

¹¹ ^pMáa siré tiran má ákona vayafó máa sé uno.
‘Betí ankan mai séi ma sivíkiyaruna varufin ída uron mi orinten
mino.’ ” *Íbo 95:7-11*

¹² Máa seruna ifo mumunan tiyofi sifá tiváeyan noe, máan tiyare mana
ano aúkáké ída mumunan esin mai avúavá ano siretí ankan aviren tavi
aípá orintiya aunan bain Tiyarafenun me ampin nampo yafían ná ákona
ono. ¹³ Máan tin nampo “Saréa”^q ana e ma sikhantiya ena ena yamu sá
ben ákona uantan maran iyasín ná ume avúavá ano siretí ineine ída e
yarifanti vá Tiyarafenun ída me oyan ameno. ¹⁴ Mai fara vara seyo, mai
ma esé araié mumunan é tiferunaí é ma Tiyarafenurá ákona inin kauré
ma oriyá maé mai Karaisin mái manafin dorá tifanté uno. ¹⁵ Máan tonté
tifé umpo ákona vaya ma sikhein ída vá áun ono.

“Taréa vá beni vaya ineno.

Tiretí ankan ída vá Isareri kéká ano ma Tiyarafenui vaya átakharé uren
ma vetí ará pákaan ákona iyá einisá ono.” *Íbo 95:7-8*

¹⁶ ^tIntéa kéká anó Tiyarafenui vaya inikhen mifo mai vaya átakharé
ukharen nafino. Mai ma Mosesi ano Isipíké iyanen erein kéka ino. ¹⁷ ^sInká
intéa kékasá Tiyarafenu ano foti (40) oranará aranan uantákaren nafino.
Mai ma kámá barafá umei uren ma fúan kipein nanin banta ino. ¹⁸ Inká
Tiyarafenu ano intéa kéka sará ída senti sivíkan barufin o feran nono sen
ákona vaya sein nafino. Mai ma veni vaya átakharé iyá ein kéka san mi
sein mino. ¹⁹ Máan tukhá in mi veti ma ída mumunan ein avúava san bei
avíkan barufin ída orinten ne sikhái afová ukhé tiféuno.

Tiyarafenui Vanasi Ano Ma Avíkan Baran Nain Baya Ino

4 ¹ Tiyarafenu ano ma vei avíkan barufin orino van ma iyáantákein mai
fara vain tiretin pinté manáa ano maifin ída orin nona van mumpo setí
ankan dafían ná ákona ukhesá bátifano. ² Mai fara vara seyo, Tiyarafenu
ano ma avíkan baru útaádan baini Kama Vaya ma vetí ankan tiamikharé
einíen tetin má deren tisimikhén mifo Tiyarafenu ano ma siamein bayará ída
mumunan íkan mi mai ano vetin ída ayaen mino. ³ ^tTiyarafenui vaya iniré

^p 3:11 Nam 14:21-23 ^q 3:13 “Taréa” e ma sikhein mai Í Bompon 95:7-8 fin ma máa
sikhein mino. “Tiretí ankan ída vá Isareri kéká ano ma Tiyarafenui vaya átakharé uren ma
vetí ará pákaan ákona iyá einisá ono.” ^r 3:16 Nam 14:1-35 ^s 3:17 1Ko 10:10 ^t 4:3 Ibu
3:11

ma mumunan iyá tiferuna kéká ano anan beni avíkan barufin oró tifanté umpo mai vayará ma ída mumunan inain kayo van máan mi sikhen mino.

“Téi sesi sirananá báí fura ódino siré té uno.

‘Mai kéká ano ída uron mi senti avíkan barufin orinten mino.’ ”

Íbo 95:11

Máan tinten mifo esé ma ma vara uvareintái veni avíkan baru útaádan ban mino. ⁴Mai fara vara seyo, yan manápá ifo afápá kan un kádan damusan béi monó bompompin máa sikhen mino. “Tiyarafenu ano yoriyá ein nan dan manápá ifo afápá kan un kádan damusí íkan mi avíken mino.” *Esé 2:2*

⁵Inká esé ma seruna vompon anafin Tiyarafenu ano máa sikhen mino.

“Mai kéká ano ída uron mi senti avíkan barurá orinten mino.” *Íbo 95:11*

⁶Tiyarafenui avíkan baru ma vain mai vanasi ano orin nain mifo fefá ma mai kama vaya siamin ma átakharé ein kéká ano mai varufin ída oren mino. ⁷Máan tiyaimpin Tiyarafenu ano vei avíkan barufin ma orin ená damú maman kaúden maí damusan taréa en tikhen mino. Pefá ma sikharé ein baya máan Devitin oo ráké uaren máa sikhen mino.

“Taréa ma véin avaya ininteya,

ída vá e ará pákaan ákona ono.”

Íbo 95:7-8

⁸“Mai fara vara seyo, Yosua ano Isareri kéká iyanen Kenaní barafin mo khaúden avíkan amen baré intin Tiyarafenu ano ída ená damusan baya siádan té ein ten mino. ⁹Máan tukhan mi Tiyarafenui vanasi ano ma avíkan nain damú ma iyáantan bain mano fara ave ukhen ban mino.

¹⁰“Mai fara vara seyo, Tiyarafenui avíkan barufin ma ódin nain kéká ano véi ma yóan kíparen avíkein an den mai avíkan o varanten mino. ¹¹Máan tukhein nará mai avíkan barufin ma orin nará ákona ó tifano. Para vara seyo, fefá ma Isareri nanin banta ano ma Tiyarafenui vaya ma átakharé einí ma inain manon eraven ankaminten mino.

¹²“Mai fara vara seyo, Tiyarafenui vayafin mi ayun ma fara van ákona víkakhen mino. Mai vaya ano vaenati ma sefá tefá an bákan ma avané iyain esantaren moékentá avan iyáken mai ano kasaen áu bá ayampa vá amasi vápin o feranten mino. Mai vaya anon áu bá ineine vá avúavá bá daiminten mino. ¹³Minó daná ma ma varará bain mano Tiyarafenu avorá ída uron mi áupá ban mino. Minó ano ma monó té aví daní é iyá tiferuna vanta avorá minó daná ano amákái van mino. Máan tukhein nará minó daná ma varé aruvé iyá tiferuna vá Tiyarafenu avorá tian amá ó tifano.

Yisas Karaisi Ma Monó Ánon Banta Kayoi Ánon Bantaí Ukhein Baya Ino

¹⁴*Máan tukhein nan mi Tiyarafenu Anin Yisas Karaisi setisi monó ánon banta kékái ánon banta anon inarufá ódikhen mino. Mai ma véintá

“ 4:8 Diu 31:7; Yos 22:4 ¨ 4:10 Ibu 4:4 ¨ 4:12 Efe 6:17; Rev 1:16; 19:13-15 * 4:14 Ibu 3:1; 10:23

mumunan iyáké ma sian dákó iyá é tiferuna vaya vá pákaan ákona ó tifano. ¹⁵Mai monó ánon banta kékái ánon banta anon tetimpin ma ída ákona vain afová ukhen arunan usintiyán mino. Mai fara vara seyo, varará nanin banta ano ma variyá tiferuna uman bariyáken inká Ban Anoni mákasimpin orivin akhenóka uan onen mifo véi ída umeíen mino. ¹⁶“Máan tukhein nará mai ma sarisari ma víkakhein kin kará ádé ída feran oriverá tiyaino van ma ékun ná arunan uren tarisari ino.

**Yisasin Ma Ve Aufó Tiyarafenun Íkun Uan Amiren
Ma Setin Evaránen Tivíkein Baya Ino**

5 ¹Banasii oo vantaí ukhen Tiyarafenu vá bayái ino van mi monó ánon banta kékái ánon bantaí maman uran ban mino. Banasi ano ma Tiyarafenun íkun uan amiyán inká tusu siantiyán ono van ma varen orin maen betíi ume ampiantano van béin Tiyarafenun íkun uan amé iyan mino. ²Béi ma varará bantan bákan ben má dere ída ákona van mifo mai ma ineine asuse ukhein nanin banta ano ma savi aintá oriyán maen bempáké ará kusin pintéi vetí ankan maman puntariyan mino. ³“Mai van mi vei ume vá banasii ume vá ampiantano van mi Tiyarafenun mo íkun uan amiyán mino. ⁴“Máan tukhantín mana vanta ano ída vá beyantá kákan bí barano van monó ánon banta kékái ánon bantaí ino. Tiyarafenu ano ma Eronin aní uran baré einíen ná béi ana vá aní urantín mai yorará ino.

⁵Máan tukhan Yisas Karaisi ano ída veyantá kákan bí barantó uno siren monó ánon banta kékái ánon bantaíen mifo Tiyarafenu anon máa siren béin mai yoran amen mino.

“Éi sen Tanin mono,
saréa éin afóení é uno.”^b

Íbo 2:7

⁶“Inká ena vompon anafin béin nan máa sikhen mino.

“Éi Merkisedekin an deya

fara van oriyán ban monó ánon bantaí e ono.”

Íbo 110:4

⁷“Ma varará ma Yisasi yorun báken purin pintena aya ino van bei arunaná pinté kákan ífí diyáken Tiyarafenu ano aya ino van béintá ákona inin kaein nan mi veni amúkin inen mino. ⁸Yisasi maen Tiyarafenu Anin mifo vara ráke uman kayo ma variyáken mi oo yayíin avúavá afová en mino. ⁹Mai aa sákéi Tiyarafenu ano véin maman monó doran banta kékái funtákein ánon bantaí uren mi kasaen minó dorará inte ne sikhen mino. Máan tukhein béi anon mai ma ven oo yayíin nain kéká evaránen avíden para van oriyán ban aunan aminten mino. ¹⁰Máan tukhein nan mi

^y 4:16 Ibu 10:19 ^z 5:3 Riv 9:7; 16:6 ^a 5:4 Eks 28:1 ^b 5:5 Manáa vompon dókifin máa sikhen mino. *Taréa éin maman te sikhast é uno.* ^c 5:6 Ibu 6:20; 7:1 ^d 5:7 Mat 26:36-46; Fir 2:6-8

Tiyarafenu ano véin maman Merkisedékin an den monó ánon banta kékái ánon bantaíen mino.

Baya Inin Avúavá Ma Me Oyan Amiyaí Pákena Aaman Baya Ino

¹¹Ma ma siamiyaruna mai kokhon bayan ban mifo ída kama e iniyanáí veni ana ída sian amá iyá uno. ¹²^eTiretí ankan pefa suron mi monó nanin bantaí ukheya eriyare ompo ena nanin banta ma afova amiyán baren mi ena kéká ano siretin evaránen monó baya fákena afova amino van iniya ono. Tiretí ankan arará iyampon mano ma ída ákona yunan nakhen ma nan anu máa ana ma niyain an mi yakharono. ¹³Máan kéká ano arará iyampon ma nan anu nein an mi yiyan pasen puntákein avúava sinta ída moéken afová ukhen mino. ¹⁴Puntákein avúavá bá ída funtákein avúavá bá ma oman afova suron uren ma funtákein avúavá ana variyain kékái nan ákona yunan ban mino.

Arará Iyampon Ma Afova Amein An Ma Yan Avúavá Ma Me Ampin Baya Ino

6 ¹Máan tukhen mifo ída vá mai ma esé araíintá ma Yisas Karaisini vaya sisimí iné tiferuna avúaváká evarané orive orive iyá bá tifano. Monó avúavá purasé afová uresá ume avúavá ma me soyan amiré erikhé tiferuna ída vá evarané mo aruviyáké Tiyarafenurá ma ákona mumunan in nará inétifano. ²Monó non péantan nafi ayan ánontá kaúden avu uantan nafi fúaren ma orun mantan nafi inká Tiyarafenu ano ma ínaimpáké ma vanasii avúavá daiminaí pákena van mana ída vá tiamiya vano. ³Máan tiya tifékun ná Tiyarafenu ano ma anunu intí maerá moékan afova vará tifano.

⁴Para vara seyo, mai ma Tiyarafenui fura vaya vá kama yanasinta vá afová en ma Kantá Aunani avúavá baren ma Tiyarafenui kama avúavá bain baya vá ⁵⁻⁶inká ínaimpáké ma ma vara kípan nain ákona vá ma afová ukhein kéká ano ma Tiyarafenun me oyan amiren orivinten maen ída kanaíen ará baeranten mino. Mai fara va ino. Máan kéká anon Tiyarafenu Anin oyan amiyáken mi véin evaránen daa unkamádantá ariyáken banasi avorá béin ankayan tiren ayave amiyán ban mino.

⁷Banasi ano ma varafin danayun dókáin ma á eren bara afú daran ma orun ampamaren ma kama aran iré iyain mai Tiyarafenui avábái varé iyan mino. ⁸^sMáan té iyan mifo mai yunan anafin ma namu naman má ayankun naman má ma e ampamaren ma yunan ana yarádantin maen mai yunan ana afóe ano mai vara van aufon ukhen mino siren ira saman kaurinten mino.

⁹Téi ma sinunu ukheruna sirona kéka soe, ma vaya ma siyaruna van mai ída siretin nan tiyá unon té iniyá tiféuno. Tiyarafenu ano ma setin

^e 5:12 1Ko 3:1-3 ^f 6:4 Mat 10:22; Ibu 10:26-27; 1Yn 5:16 ^s 6:8 Esé 3:17-18; Mat 13:7, 22

tiya uren tivíkeimpin ma kama yaná afoká inti ma varan nona rái inin onan kaúka ononté inikhé tiféuno. ¹⁰ ^hMai fara vara seyo, Tiyarafenu ano funtáken ban mino. Mai ma veni ákona yorari iya ma mumunan nanin banta avábá ureya ayaiya ma kama e yafisiya vaona van búi ída áun inten mino. ¹¹ Ena ma ará amin avúavá ákona uan pákaráke oriyareya mai ma ákona inin onan kauráke ma ave iya vaona yaná purase o varano van mi setí ankan tinunu ukhé uno. ¹² Máan ma inteyan monó avúavápin ída avesara in nono. Máan tin nompo mai ma Tiyarafenu ano iyáantan bain daná ma fura sen afoká intéi uno siren ma mai yanáká ákona mumunan kaúdáken kama avúavá ana varen oriyaren ma mai yaná o varein kéká an mi yan nono.

**Tiyarafenu Ano Ma Iyáantan Danáká Ma
Ákona Mumunan Kain Baya Ino**

¹³ Mana vanta ano ída Tiyarafenun esantakheimpin mi veyantá be avíkái ayan befió uren pura ódino siren mi Abaraamun máa sen iyáan ten mino.

¹⁴ “Éin purasé moeké avu uantádé

en ana akhá maman kokhoni suron uantanté uno. *Esé 22:17*

¹⁵ Máa siran ará kusin má Abaraamu ave ukharen mai ma Tiyarafenu ano iyáantáká ein daná baren mino.

¹⁶ Mana vanta ano ma mana yaná ma ena kéká iyáantano van maen ben ma esantakhein banta avíkái ayan befiyó uren pura ódino siran mi mai ano fura sen ákona ukharéin mi ída ara ara vaya vákan kasaen baré iyan mino. ¹⁷ Máan avúaváká anan ten mi mai ma iyáantákáin nain kéká ano fura sé baranté uno siren ákona mumunan ino van mi Tiyarafenu ano veyantá ayan befiyó uren pura ódino sikhein ída kanaíen do varanten mino. ¹⁸ ⁱMáan tukhein nan mi Tiyarafenu ano setin iyátintáden inká ayan befiyó uren pura ódino siran ban mino. Maíkan dana san ma Tiyarafenu ano kampun tiantáden ma yurafurimpin ída seso sikhen mino. Máan tukhein nará mai ma ven ópá aúmaneno van muno siré ma karan oronuna kéká ano kasaé mantaan ákona uvé maé mai ma iyátintan bain danáká ákona inin kaó tifanté uno.

¹⁹ ^jMai ma ave ukhé ma ákona inin onan kaiyá tiferuna anon sipii ankan ma un nompin kain orun pákaan ákona ukhen bain an mi setin tuká ukhen mino. Mai anon tetin tiviren inarufá ma vain monó namumpin ma moéken kantasí ukhein karafaran ma iyákein davaráe esantaren maen Tiyarafenui kantasí ukhein karafarampin ódiyan mino. ²⁰ Yisasi ano setin tiya ono van pefái maifin un báken Merkisedekin an den para van oriyen ban monó ánon banta kékái ánon bantaí ukhen mino.

^h 6:10 Ibu 10:32-34 ⁱ 6:18 Nam 23:19 ^j 6:19-20 Riv 16:2-3

Merkisedekini Vaya Ino

7 ¹kMerkisedeki maen Saremí^l kákan barui kin báken inká moéken dan bain Tiyaarafenui monó ánon banta ino. Máan tukharen maen Abaraamu ma kokhon kin kéká bá ma kákan aruvirí uren betin aruan kípáren ma evaránen barufá orono van eriyen ma Merkisedekin má ayanafá o fóká maen béin avu amen mino. ²Máan turan maen Abaraamu ano mai ma aruvúden baren erein danasinta siyan míkampintan daíden mana masiman Merkisedekin amen mino. Merkisedekin ne ma sikhein bíi ana maen mai funtákein avúavái kin nen ten mino. Inká Saremí kin ne ma sikheini ana maen mai ará kusian tiyáken kusin baren erin kin nen tikhen mino. ³Tiyaarafenui vompompin ben anoifon má anafu aráon má ma afoká ukheini ana vaya ída váken inká ben ma khæin má be ma o furein máí ana vaya yere ída van mino. Béi maen Tiyaarafenu Anin an daven mi fara van oriyen ban monó ánon bantaí ukhen mino.

⁴Merkisedeki ma kákan bantaí ukharé ein ná ovare me ineno. Abaraamu maen Isarerí barafin aví bain bantan baren mifo mai ma aruvín pintena varen eriyá ein danasinta ma siyan míkampintan daíden ma mana masiman Merkisedekin ma amikhein manon kákan danasí ukhen mifo afovasá ono. ⁵^mRivain anan banta finté ma monó banta kékasí ukhein nan Mosesini man baya ano máan mi sikharen mino. Minó ano siyan míkampintan daíden ná mana masiman betin amino sikhæn maen betí afá aváeyan pinten nan e variyaren mifo mai Abaraamun anavasin manan baren mino. ⁶Máan tiyaren mifo Merkisedeki maen ída Rivain anan banta anon Abaraamun pintena mana masiman barein mino. Mamaren mi mai ma Tiyaarafenu ano fefá ma iyáantan baré ein banta Abaraamun ánotá ayan kaúden avu amein mino. ⁷Máan tukhantin ída mana inain bantin maen avu amin ákona ma vain banta anoi mai ma avu variyain banta esantakhen mino.

⁸Purin nain monó ánon banta kéká anon Yutan kayo fintena mana masiman bariyaren mifo Merkisedeki ano mai kéká esantakhen mino. Mai fara va ino. Béin nan ma ayun para van ne ma sikhein mano ino. ⁹Inká ena ma vain mai Rivaini anan banta kéká ano ma mana masiman máden maen betíi anáu Abaraamun pinté uaren Merkisedekin amikharen minon té tifanté uno. ¹⁰Mai fara vara seyo, Rivai ma ída afoká ukhan maen be anáu Abaraamun pinten nan Merkisedeki ano mana masiman mantaren mino.

Yisasi Ma Merkisedekin An Dakhein Baya Ino

¹¹Rivain anan banta ano ma kanaíen Tiyaarafenui yoran mo kípáren ukhantin mai fará Tiyaarafenu ano Rivain nú Eronin núí kéká pintena ída

^k 7:1-3 Esé 14:17-20 ^l 7.1 Saremí e ma siyain mai Yerusaremí baru van mi sikhæn mino.

^m 7:5 Nam 18:21

siantanton ná Merkisedekin an dakhein banta siantantin erino van en nafino.

¹²Para vara seyo, ena kéká ma mamán monó ánon bantaí iyáken maen mai auyen man baya vá uvarano. ¹³Mai fara vara seyo, ma ma siamiyaruna vanta vá bei kéká bá maen mai ena anan pintena kékái váken mai ma onámaná karánará uádantá ma íkun uan amiyain doran pefá ída yókaren mino. ¹⁴“Mai van téi máan mi siyá uno. Tetisi Bafan maen mai Yutan anan pintéi afoká ukhan mai anan pinté ída monó ánon bantaí inten ne sen Mosesi ano sian amá ukharen mino.

¹⁵Merkisedekin an dakhein banta ma mamán monó ánon bantaí urantin ma ena avúaváká doran nain nan ma Tiyaarafenu auyen man baya ano sikheí pákenan tian amá iyá tiferuna mai afová inono. ¹⁶Béi ma monó ánon bantaí ein mai Rivaini kéká ano ma variyá ein avúavá kasa ifo mai ma fara van oriyán ban aunani ákonará ino. ¹⁷“Máan tukhan mi Karaisín nan Í Bompon pin máa sikhen mino.

“Éi Merkisedekin an dakhe,

fara van oriyán ban monó ánon bantaí e ono.”

Íbo 110:4

¹⁸Peyante man bayará ma monó dorarí iyá ein mai ída ákona vákan mo namu ukheimpin do mamán akhempá kaen mino. ¹⁹“Mai fara va ino. Man baya ano ída mana yaná mamán kama íkan mi moéken kama ukhein danáká ma inin onan kaúden ave ukhein ban manon beni varu varen mino. Mai aa sákéi setin e sivían Tiyaarafenu ádé mo khaiyan mino.

²⁰Tiyaarafenu ano Karaisín nan mi ayan befiyó uren pura ódino siren mi fara van oriyán ban monó ánon bantaí inono sikhen mifo ena monó ánon banta kayo van ída máa sikhen mino. ²¹“Tiyaarafenu ano Yisasín manan máa sen tiamen mino.

“Bafan mano ayan befiyó uren pura ódino sikhein,

bei vaya ída yurafurinten mino.

Éi fara van oriyán ban monó ánon bantaí e ono.’ ”

Íbo 110:4

²²“Tiyaarafenu ano ma ayan befiyó uren ma fura ódino síkhá ein nan mi mai ma manafín kasén ban avúavá Yisasi ano me yóan kanaí uren mi mamán kama uáden mino.

²³Inká ena ma vain mai feyante avúavákái kokhon monó ánon banta kéká ano yoriyaren mino. Mana vanta ano ma monó doraríen oriyaren ma fúbin maen ena anon beni varu variyaren mino. ²⁴Máan tiyaren mifo Yisasi maen para van oriyán ban monó ánon bantan bantin mai yoran mano ída mo kípanten mino. ²⁵“Máan tukhein nan mi intéa kéká anó béin pinté uaren ná Tiyaarafenu vaintá erinten nafi mai vetin aya uré evaránen

ⁿ 7:14 Ais 11:1; Mat 2:6; Rev 5:5 ^o 7:17 Ibu 5:6 ^p 7:19 Ibu 10:22; Yem 4:8 ^q 7:21 Ibu 5:6 ^r 7:22 Ibu 8:6; 12:24 ^s 7:25 Rom 8:34

avíðantin para van oriyán bano van mi inikhen mino. Béin para van oriyán báken mi setisi ume ampisintano van Tiýarafenun tiamiyán ban mino.

²⁶Béimpin íða mana ume vákan kantasíen avusesse ukhen baréin mi ume nanin banta finte véin avían dan bain barurá kaúden inarufá kákan bí amiran báken ma siya iyain monó ánon banta ino. ²⁷Béi íða ena monó ánon banta kékái ánon banta ano ma minó damú Tiýarafenun íkun uan amiyá ein an danten mino. Mai kéká ano vetíi ume van naren íkun uan amiren mi ínaimpáké banasii ume van íkun uan amiyaren mino. Máan tiyaren mifo Yisasi maen manádái minó nanin bantai ume van íkun uan amen daa unkamádantá púken mino. ²⁸Bara ráke vantai ákona íða vákan mi Mosesini man baya ánain dakhafen monó ánon banta kékái ánon bantaí iyaren mino. Máan tiyaréin ma man baya amiren maen mai oyampákéi Tiýarafenu ano ve Anintá ayan befiyó uren pura ódino siren mi véin nan puntákein avúavá baren oriyán bante ne sen aníen mino.

Karaisi Maen Auyen Avúaváká Ma Kasen Bani Monó Ánon Banta Ino

8 ¹Ma ma senuna mai ana vaya ino. Tetisi monó ánon banta kékái ánon banta Yisasi ano inarufá kákan bí mamaren Tiýarafenun ayan kurompá kumanten mino. ²Máan tukhan maen mai ma fura sen kantasí ukhein monó namun ma varará banta ano íða uvaran ma Bafan mano veyantá uvantein namumpin mi monó dorarí iyan mino.

³Banasi ano ma Tiýarafenun tusu siantan daná bá inká íkun uan amin daná bá ma varen moran maen mi monó ánon banta kékái ánon banta kayo fintena mana aní uran mi mai yanasinta varen mo Tiýarafenun íkun uan amiyaren mino. Máan tiyaren mifo setisi auyen monó ánon banta kékái ánon banta ano yere vá manáa yanasinta varen Tiýarafenun mo íkun uan amino. ⁴Béi ma varará bano sen baren íða kanafen monó ánon bantaí ina inten mino. Mai fara vara seyo, Mosesini man baya ano ma sikhein ánain dakhafen pefái monó ánon banta kéká ano Tiýarafenun íkun uan amiyán mino. ⁵Mai ma fura sikhein monó namun ma inarufá baini aman mi ma varará ma vain monó namun bákan maifin mi yoriyan mino. Mai fara vara seyo, Tiýarafenun monó tiantan namun ma Mosesi uvarano van iyan maen Tiýarafenu ano ákonaen ma vayan tiamikharen mino. “Ma anuyontá ma aní eruna avúavá kasá teya minó daná uvarano.” *Eks 25:40*

⁶Máa sikharen mifo ma varará ma feyante man baya ánain dakhafen ma yoriyá ein kéká esantaren moéken kama ukhein doran mi setisi monó ánon banta amen mino. Para vara seyo, kama avúaváká ma Tiýarafenu vá kasen ban mi véi ano moéken kama ukhein danasintafó iyátintan ban mino.

Auyen Kasen Ban Mano Ma Feyante Kasen Ban Esantakhein Baya Ino

⁷Para vara seyo, esé araíntá ma kasen ban avúavá ma vareimpin íða mana uman baré intin íða evaránen ena kasen ban avúavá kain nainten

[†] 7:27 Ibu 5:3 [‡] 8:5 Kor 2:17; Ibu 9:23 [¶] 8:6 Ibu 7:22

mino. ⁸Máan tin nainten mifo fefá ma manafin kasen ban avúavá ma mantaré ein pintena Ti yarafenu ano onákan banasi ano ume avúavá bariyaimpin mi máa sikhén mino.

“Bafan mano siyáken damú ma erintí,
Isareri vá Yutan nanin banta vá ma
ayen avúaváká ma manafin kasen ban amenté uno.

⁹Auyen kasen ban mano
vetí anáuyan má ma manafin kasen ban ma uvantá eruna vá ída
manaí inten mino.

Inká mai ma vetin ayan pákaaré,
ma Isipi vara finte yo aviré merékun maen
mai ma vetin má ma manafin kasé banuna van ma siamikhá erunerá
ída ákona inin kaeimpin mi
vetin me soyan amé uno sen Bafan mano sen mino.

¹⁰Máan tukharé umpo ma maen auyen kasen ban mi
Isareri nanin banta vá taréa uvaranté unon ten Bafan mano sen
mantino.

Tesi man baya kayo vetí inimpin kaúdékun
betí ankan mai ana afová uvintí maé
inká betí ankan auká uvádékun
mai ánain dakhafinten mino.

Téi vetí Ayarafenu vákun
betí ankan tenti vanasin banten mino.

¹¹Báken betí arona fi
áa vetí kéka safi ída afova amiyáken
Bafan ná afová ono sen ída siaminten mino.

Mai fara vara seyo, aví ída vain kéká káké ma aví bain kékáká ma o
khanaí ukhein
mai minó anon téin pefá afová inten mino.

¹²Para vara seyo, veti ma namu avúavá bariyá inain ampíantádé
ída evarané betí ume van ineine onté uno. *Yer 31:31-34*

¹³Ti yarafenu ano ma auyen avúaváká ma manafin kasen ban nan ma
siyanti mae mai feyante kasen bani ákona ano inka o khípiyan mi yo
maman akhempá kaono van mantino.

Ma Vara Ráke Monó Namumpin Ma Feyante Avúaváká Monó Tiyá Ein Baya Ino

9 ¹Esé arafintá kantasí ukhein davaráe namun mi ma varará
uvádáken Ti yarafenu vá Isareri kéká bá manafin kasen ban avúavá
bákan monó tiyaren mino. ²Mai yavaráe namumpin kankanan karafaran

^w 9:1-2 Eks 25:23–26:30

mi varen mino. Esé karafarampin on ma antúduan divin danka vá dunan kain kará bá bákan mai yarói airo ananí ukhein bereti kain baren mino. Mai karafarampin nan mi Kantasí Ukhein Karafaran ne siyaren mino. ^{3*}Inká mai oyampá ena kharafaran davaráe fóké e auádan bákan mai karafaran nan mi Moéken Kantasí Ukhein Karafaran ne siyaren mino. ^{4*}Mai karafarampin maen aunka fauran ma íkun uan amin kará ma korifó uvantein má inká daafó uváden ma korifó me iyákein bokhise vái kain baren mino. Mai vokhisefin manna e ma siyain bereti kayo ma kaúkein kori khave vá Aronini ayonta ráké ma ariké e fótein danka vá inká tiyan míkan man bayafin ma manafin kasen ban baya uvantein onámaná báí kain baren mino. ^{5*}Mai vokhise yarói vanasii ume ma ampian tiyain bákan serubimi e ma siyan ma Tiyarafenui kakhan má ma vain daná kankanan korifó uváden mai yaró kaíkan ayan tátá uren baren mino. Máan tukharen mifo saréa ída kanaí é mai yanasinta fáke sian amá ó tifanté uno.

^{6*}Mai yanasinta ma arakhóku uan kaúden maen monó banta ánon kéká ano esé ma vain karafarampin mi ena ena un peren kuven iyáken mai ma amikhá ein dorarí iyaren mino. ^{7*}Máan tiyaren mifo monó ánon banta kékái ánon banta ano anan Moéken ma Kantasí Ukhein Karafarampin manádá anan ena ena oranafin ódiyaren mino. Ódiyáken maen bei ume vá inká banasi ano ma ída afová ukhen ma variyá ein ume vá arúantano van nare yáaren Tiyarafenui mun ákonte uan amiyaren mino. ^{8*}Mai avúavá ma varará bain monó namumpin ma fara vantin maen banasi ano ída kanaíen Tiyarafenui Moéken Kantasí ukhein karafarampin ódinten ne sen Kantá Aunan mano setin aní ukhen mino.

^{9*}Mai monó namun nan ma siyain mai saréa ma afoká inain dana san mi aní ukharen mino. Mai ma monó ánon banta kéká ano ma susu siantan danasinta vá inká íkun uan amin danasinta vápó ma íkun uan amiyaré ein mano ída kanaíen monó nanin bantai ineine fintena sesé uantiyaren mino. ^{10*}Betí ankan peyante avúavá ánain dakhafen dunan má non mápó mai avúavá bariyantín dan bukhafa ana sesé en oriyantin mai ma siádan baré ein damú afoká ino van mi sikharen mino.

Yisas Karaisini Nare Ano Ma Funtákein Ákonte Ukhein Baya Ino

^{11*}Máa sikharéin taréa Karaisi ano kama yaná kayo ma afoká eintá o monó ánon banta kékái ánon bantaí en mino. Máan tuven mai ma ma varará banta ayan mano ída uvaran ma inká ma varará ma uvamádan bain danasinta vá ma ída manaí ukhan ma moéken kama ukhein monó namun ma inarufá baimpin mi óden mino. ^{12*}Óden mifo memé

* 9:3 Eks 26:31-33 ^y 9:4 Eks 16:33; 25:10-16; 30:1-6; Nam 17:8-11; Diu 10:3-5 ^z 9:5 Eks 25:18-22 ^a 9:6 Nam 18:2-6 ^b 9:7 Riv 16:2-34 ^c 9:9 Ibu 10:1-2

bá kao vái nare fóké ákonte ono vara mai ma Moéken Kantasí Ukhein karafarampin óden naino. Ída ino. Karaisi ano ume fintena vanasi aya uren evaránen avirano van mi vei nare fóké manádá Tiyarafenu íkun uan amen mino.

¹³ ^dPeyan avúavápin meméi nare vá afon kaóí nare vá inká arará kaoi kasí bá anon kanaíen man baya ma yurafurein nanin bantai yan bukhafa sesé iyaren mino. ¹⁴ ^eMáan tiyaren mifo setisi ume sivútivá ano ma furin aasá tiviren oriyaré in ma Tiyarafenu monó tiantano van ma Karaisi ano vei narefó ma setin tú tesé ukhein nará ovare me ineno. Mai fara vara seyo, Karaisi anon para van oriyen ban Kantá Aunani ákona fói ve au fóké tetisi ume van puntákein íkun uan Tiyarafenu amen mino. ¹⁵ Mai ana van mi Tiyarafenu ano ma arakhein nanin banta ano kasaen mai ma fara van oriyen ban aunan ma iyáatan bain barano van mi véi ano Tiyarafenu vá banasi vá aúbaná báken auyen avúavápin ma kasen ban aa uvíken mino. Para vara seyo, esékene kasen ban ma kain baré ein mano umei miyan uman manan amiyaré íkan mi mai uman pinten nan útúantano van Karaisi e furen mino.

¹⁶ Máan tukhantin mana vanta ano ma veina yanasintará bompon uvariýáken ma mana iyampon nan téi ma fúbékuya sesina yanasinta éi vá barano sikharen ma fura sen púbintin manan mai ma iyáan takháin nain iyampon mano venina yanasinta varanten mino. ¹⁷ Mai fara vara seyo, mai ma vompon uváden iyáantein banta ano ma ída fúkantin maen mai ma iyáantan mano fara ave ukhen baré intin ma véi fúbintin mi mai ma iyáantein danasinta varanten mino.

¹⁸ Máan manan en mi esékene kasen bani avúavápin ma nare ma ída vantin maen mai ída ákona vanten mino. ¹⁹ Mosesi ma Tiyarafenu man baya kayo maman banasi amiren maen arará kaoi nare vá meméi nare vá maman non má manafiníen mino. Máan turen isopi yaa ayan má inká sipisipi ayorá ma nararé kava fékein mápó maifin morun daaren mi Tiyarafenu vompon dóki vá banasi aufá bá péantákaren mino. ²⁰ Máan turen maen betin máa sen tiamikharen mino. “Mai ma Tiyarafenu ano siretin má manafiní é kasé bano van ma sikhare ein mi ma narefó perékun mai anon maman pura yanasí en mino.” *Eks 24:6-8*

²¹ ^fMáan mana en mi mai ma yavaráefó ma uvantein monó namun má inká maifin ma vákan doriyain danasintará bá ina nare feren mino. ²² ^gMai van mi Mosesini man baya ano siyáken nare ano anan minó danasinta sesé inten mifo mana yaná ma ída aruren narefó ákonte intin mai Tiyarafenu ano ída kanaíen ume ampiantante ne sikharen mino.

^d 9:13 Riv 16:15-16; Nam 19:9, 17-19; Ibu 10:4 ^e 9:14 1Pi 1:18-19 ^f 9:21 Riv 8:15, 19
^g 9:22 Riv 17:11

²³ ^hMáan tukhein nan mi varará ma vain davaráe namun má maifin ma vain danasinta vá anon inarufá ma vain danasintai aman mi vákan Tiya rafenui man baya ma safúnai nare fóké sá ákonte ono sikhen mino. Máa sikhan mifo fura yanasinta ma inarufá bain mai safúnai nare esantakhein daná pói ákonte uren tesé uan avusese ukhen mino.

²⁴ Mai fara vara seyo, ma varará ma uvamádan baré ein danasinta mai inarufá ma vain danasintai aman mi varen mino. Máan tukhá ma varará ma vain monó namumpin na Kara isi óden naifo mai ma inarufá ma vain monó namumpin mi un báken teti ma variyá tiferuna uman pintena siya ino van Tiya rafenun avorá ákonaen duvuniyan mino.

²⁵ Inká ena ena oranafin ma monó ánon banta kékái ánon banta ano ma Moéken Kantasí ukhein karafarampin ma safúnai narefó ákonte iyá ein an den ná be aufó ena ena Tiya rafenun íkun uan amiyan bano vará inarufá ódikhen nafino. Ída uron mino. ²⁶ ⁱKokhon dadasá purono sen baré intin ma vara ma arái ein tákéi véi o furen eriyen ban nainten mifo ma vara ano me akhen diyan manádái umei ákona finte fura sen utútintano van mi e fúaren bei narefó me ákonte ukhen mino.

²⁷ Barará nanin banta ano ma manádá púkaren ínaimpáké kópin o mantan nain an mi yakhen mino. ²⁸ Máan tukhan kokhon nanin bantai ume ampiantano van Kara isi ano manádái e fúaren bei narefó ákonte ukhen mino. Béi ma ovaránen erinten maen banasii ume evarané ampiantiyá bano vara erinten naino. Ída ino. Mai ma véin ave ukháin nain kéká avirano van mi erinten mino.

Tafúnai Nare Ano Ma Ída Kanaí En Banasii Ume Arúantan Nain Baya Ino

10 ¹ Mosesini man baya maen mai ma ínaimpá ma kama yaná erin nain aman mi varen mifo Yisas Kara isi ano ma fura sikhein daná ma varen erein naino. Ída ino. Para va máa siya rauno. Mai ma ena ena oranafin ma safúnai narefó ma ákonte uanten eriyá ein mano ída uron mi vanasi ano ma monó tiyá ein ayaiyaren mino. ² Pura siren ume arúanten baré intin mai ma íkun uan amin avúavá ída vanainten mino. Mai fara vara seyo, manádá ma íkun uan amin avúavá ano ma monó nanin bantai ume ma ena ena sesé urantin maen mai ída umei ukhé uno sen afová inainten mino.

³ Máan tiyaren mifo mai ma ena ena oranafin ma manádá ákonte iyaré ein mano mai ma umei ukhá ein mi aní uantiyaren mino. ⁴ ^j Mai fara vara seyo, mémé bá afon kao vái nare ano ída kanaíen ume arúantanten mino. ⁵ Máan tukhan pasen Yisas Kara isi ma ma varará dorun báken máan mi sikharen mino.

^h 9:23 Ibu 8:5; 10:1 ⁱ 9:26 Ibu 10:10 ^j 10:4 Ibu 9:13

“Íkun uan amin avúavá bá ákonte in avúava ba san éi ída anunun e ompo sen tui útaan kaútinte ono.

6 Ume arun mino siren ma íkun uan amin má inká tafúna aruren ma íkun uan amin avúavá ba san éi ída amusin ukha ono.

7 Máan tiyaonafin mi séi siyáké, ‘Masi séi vakun, Bompon dókifin téin nan mi sikhen mino.

Tiyarafenu oe, éin oo yaiyé dorano van mi erikhé uno.’ ” *Íbo 40:6-8*

8 Esé araíen Yisas Karaisi máa semí, “Ara ara yanápó ma íkun uan amin nafi safúna ma aruren íkun uan amin nafi inká ume ampiantano siren ma íkun uan amin nafi mai Mosesini man baya ano sikha ompo mai avúava sinta van éi ída anunu ure amusin e ono.” 9 Máa siren temí, “Éin oo yaiyé dorano van mi eré uno.” Esé ma kasen ban man baya ma amikhá ein do mádé auyen avúaváká ma kasen ban man baya maman dákó ono van mi máa sen mino. 10 ^kMai van mi minó damú para oriyan bano van Yisas Karaisi ano ve aufó Tiyarafenun manádá íkun uan amiren tetin maman kantasí urá bá tiféuno.

Yisas Karaisi Ano Minó Nanin Banta Van Manádái Tiyarafenun Íkun Uan Amikhen Mino

11 ^lPeyante avúaváká ma kasen ban aránaó ma váken monó ánon banta kayo ano ena ena yamú monó dorarí iyáken inká ume arumino van ena ena íkun uan amiyaren mifo mai ano ída kanaíen arumiyaren mino. 12 Máan tiyaren mifo setisi Monó Anon Doran Banta ano ume ampisintano van kama avúavasíen minó damú kena manádá íkun uan Tiyarafenun amiren ben ayan kuompá kin karáká un kumanten mino. 13 ^mUn kumanten mi vei namuro kayo maman bararasí uren beni arantan kain karasí ino van ave ukhen mino. 14 Mai fara vara seyo, ve aufó ma manádá íkun uan Tiyarafenun amein avúavá anon mai ma funtákein avúavá bariyain kéka maman kantasí iyan mino. 15 Máan tukhan Kantá Aunan mano yere mai van tetimpin tian amá iyáken esé araf in baya máa sikhen mino.

16 ⁿ“Tesi vanasi vá ma auyen avúaváká kasen ban maen maí damúi yamuan kaonté uno sen Bafan mano sikhen mino. Betí ankan aúká ma sesi man baya kaúde maé inká betíi ineinefin uvádékun mai vaya ánain bákurinten mino.”

Yer 31:33

17 Máa siren evaránen temí,

^k 10:10 Ibu 9:12 ^l 10:11 Eks 29:38 ^m 10:13 Íbo 110:1 ⁿ 10:16 Ibu 8:10

“Betí ankan ma man baya átakharé uren ume avúavá ma variyá ein nan

ída ovaré me ineine onté uno.”

Yer 31:34

¹⁸Máan tukhein nan mi ume ma ampiantá dantin maen ída evaránen íkun uan amin avúavá banten mino.

Tiyarafenun Ádé Ma Orin Baya Ino

¹⁹°Máan tukhein nan mi mumunan tiyofi sifá tiváeyan noe, Yisasini nare ano setin maman avusese ukhein pasé ída feran kasaé Moéken Kantasí ma Ukhein Karafarampin ódó tifanté uno. ²⁰°Mai ma yavaráe fóké ma are ukhá ein mi Yisas Karaisi ano vei furimpó auyen aunan ma varan aa uvisiyáken do varen mino.

²¹Máan tukhan maen Tiyarafenui vanasirái setisi kákaní ukhein Monó Anon Banta anon daffken mino. ²²°Máan tukhanti erí tifé purasé túkáké bentá mumunan é Tiyarafenun ádesá oró tifano. Mai fara vara seyo, Yisas Karaisini nare anon tetinti namu ineine maman avusese uren ída fain bain nompói minó bukhafa sesé ukhen mino.

²³Mai ma Tiyarafenu ano amenté uno sikhá ma ákona mumunan iyá tiferuna ída vá me ampé tifano. Para vara seyo, Tiyarafenu ano vei vaya ánain mi yakhafen mai ma iyáantan bá ein daná amé iyan mino. ²⁴Máan tukhein nará erí tifesá ará amin avúavápó ben aya ven aya iyáké kama avúavá ana vá bará tifano. ²⁵°Máan tiyáké ída vá manáa kéká an desá manafin ma átaruin avúavá me ampé tifano. Beni erin inka ádesí ukhen mifo erí tifesá ben ma moéken ákona uantan maran ná ó tifano.

Ída Ma Tiyarafenu Anin Oyan Amin Baya Ino

²⁶°Máan tukhen mifo fura sikhein baya ma afová ure ma evaráne umeí iya vante mae mai ume ma ampiantano van ma íkun uan amin avúavá ena ída vanten mino. ²⁷°Máan tinten mifo Tiyarafenui kó barufin ma o mantan má kákan ira ano ma veni namuro kayo saman kaurin nain má anan ave ó tifanté uno. ²⁸°Mana ano ma Mosesini man baya yurafúdan ma kan mano fi kanú manau ano safi ma ódaran maen ída avo uantan bákan esé anan aruan puriyaren mino. ²⁹°Máan tukhantin intéa kéká anó Tiyarafenu Anin barafin daren ná arantampó dosasí iyáken ná auyen kasen ban man baya ma vei narefó ákonte ukhein maman painí iyáken ma inká tarisari amé iyain Aunan ma ankayan tiyá inten nafi mai kéká ano kákan uman uron mi varanten mino.

° 10:19 Ibu 4:16 ° 10:20 Mat 27:51 ° 10:22 Riv 8:30; Isi 36:25; Efe 5:26 ° 10:25 Ibu 3:13 ° 10:26 Ibu 6:4-8 ° 10:27 Ais 26:11 ° 10:28 Diu 17:6; 19:15 ° 10:29 Mat 12:30-32; 1Ko 11:27-29

³⁰“Mai fara vara seyo, setí ankan afová ukhékun beyantá máa sikhen mino.

“Mai anonafá betin daidé uman amenté uno.”

“Mai yaná ma varano van iyain kéká evarané amenté uno.”

Diu 32:35

Máa siren evaránen temí,

“Bafan mano veyantái vei vanasi yaiminten mino.” *Diu 32:36*

³¹Máan ume vá ma ayun para van oriyen ban Tiyaafenun ayampin ma orin maen mai namu ukhan kákan akhokho yanái van mino.

Mumunan Avúavápin Ma Mantaan Ákona In Baya Ino

³²Mai ma esé aráíntá ma Yisas Karaisini kama vaya inire afova vareona van ída vá áun nono. Moékentá uman bariyáke ma ákonaen mantakhá eona vará ovare me ineno. ³³Manáa yamú tiretí ankan avían banasi avorá mo khaúden maen aruren uman amiyaren mino. Inká ená damú tiretí ankan mano ena kéká ma uman bariya mae oyampá mantaveya aya iya ono. ³⁴*Máan tiyan nan ma siretin páken karavusíí mo ura mae maífin ma vain kéká bá kama iya mae inká tiretin nina yanasinta ma vara maeya sentisi kama ukhein danasinta inarufái yan bane se afová ukhe fase amusin manan iyare ono.

³⁵Máan tiya ompo mai ma Tiyaafenurá ma ákona inin dáke ma mumunan iyaona avúavá ída vá me ampiyákeya mai ma kákan miyan ma ave ukhein nará ovare me ineno. ³⁶Mantaan ákona ukhe ma Tiyaafenui anunu ánain ma yakhafiya maeya mai ma iyáantákein amusin baran nono.

³⁷Mai fara vara seyo, Tiyaafenui Vompon dókifin máa sikhen mino.

“Ída ayáká ban mi

mai ma Ereno Sikhein Banta ainen erinten mino.

³⁸Máan tinten mifo funtákein banta ma váken maen tentá anan mumunan iyan banten mino.

Inká ten ma oyan timikhá inain kéká ída simusin uantanté uno.”

Aba 2:3-4

³⁹Máan tinten mifo mai ma Tiyaafenun oyan amiren ma ainen eraven ankamé iyain kéká an ída yakhé tifé umpo ákona mumunan má ma van oriyen ma o ayain baré iyain kékái vá tiféuno.

Ákona Mumunan Má Ma Varé Ein Kékái Vaya Ino

11 ¹Inte avúava sará mamunan ne siyan nafino. Mai ma ída onté tiferuna yana san ma afoká intéí uno siré purasé ákona inin

^w 10:30 Íbo 135:14 ^x 10:34 Mat 5:11-12; 6:20 ^y 11:1 2Ko 5:7

kaiyá tiferuna van mi mumunan ne siyan mino. ²Pefá ma varé ein nanin banta ano ákona mumunan iyákan mai van mi Tiyaarafenu ano kana ino siren amusin ukharen mino.

³Ma varará ma saréa afoká ukhá ma oniyá tiferuna yanasinta maen mai suufó ma ída oniyá tiferuna yanasintan baré íkan mi Tiyaarafenu ano ma seintái mai yanasinta afoká ukhen ne sé afová iyái mumunan iyá tiféuno.

Ebori Inoki Noa Nénei Mumunan In Baya Ino

⁴Ebori ano ákona mumunan má baren mi Kenin esantaren Tiyaarafenu ano amusin ein avúaváká íkun uan amen mino. Eborini íkun uan amin avúava san ma Tiyaarafenu ano amusin ein manon aníen béin nan puntákein banta e sen mino. Máan turen béi fefái fúken mifo véi ma mumunan ukhá ein avúavá ano saréa o sisimen eriyen mino.

⁵^bMumunan manon tíkan Inokin maen ída fúken ayun para van mi Tiyaarafenu ano véin aviren inarufá orivin béin nan dosivaen ifáen mino. Ínaimpáké béin aviren orintéin maen Tiyaarafenu ano véin nan amusin ukhein bantan baren mino. ⁶Máan tukhein nan mi ída ma mumunan inteya ída kanaíe Tiyaarafenu amusin amin nono. Béi vaípá ma orono van inain kéká ano vá mumunana iyáken ná pura sen Tiyaarafenu váken mi ven nan ma anunu uren dosein kéká kama miyan amé iyan mino vá tino.

⁷Noa ano mumunan iyaren mi ída afoká ukhá ein daná afoká inten ne sen ma Tiyaarafenu ano afova vaya siamin maen ben oo yaiyen sipi uváden mi ve aná akhafana vá anafú basin nan má maifin ódivíkan non taven ída aren mino. Noa ma mumunan iyáken ma variyá ein avúavá ano ma ma vara ráke nanin bantai ume avúavá daídan ma vetin amaniná uman afoká ein manon Tiyaarafenu avorá puntákein bantái ukhen mino.

Abaraamun Nú Be Aná Saran Núi Mumunan In Baya Ino

⁸^dTiyaarafenu ano Abaraamun nan enafá bain bara éin amenté umpo ei varu vá me ampireya orono ma síkan béi mumunan iyáken mi ven oo yaiyen mai ma véi orin naipá ída afová ukhen para oren mino. ⁹Béin ma Tiyaarafenu ano iyáantan baré ein barafin ma oriven maen toya vanta an dakhen mumunan mái yavaráe namumpin baren mino. Inká Tiyaarafenu ano ma iyáantan bantá kan Aisakin nú Yekopun nú ano yere máan manan en davaráe namumpin baren mino. ¹⁰Para va Abaraamu ano mai avúavá bariyaren naino. Mai ma veni akhen ída vain baru ma Tiyaarafenu ano uvantein nan mi ákona inin kaúden ave ukharen mino.

^a 11:3 Esé 1:1; Íbo 33:6; Yon 1:3 ^a 11:4 Esé 4:3-10 ^b 11:5 Esé 5:21-24 ^c 11:7 Esé 6:13-7:1 ^d 11:8 Esé 12:1-5 ^e 11:9 Esé 35:12

¹¹^fSaran nú Abaraamun nú ayokhuviní ukhan Sara a nanin baren mifo mai ma Tiyaarafenu ano ma iyátintákein daná timinten ne siren míkanan ákonaen mumunan iyan baren mi iyampon kaen mino.

¹²^gMáan tukhein nan mi Abaraamu maen ayokhuviníen puroren ukhen ída iyampon kaoren mifo ven ana akhafana anon ayompin ma vain ofu kayo vá inká un non akhempá ma vain eyu kayo vá an den ída yankaforen ukhen mino.

¹³^hMai kéká ano Tiyaarafenu ma iyáantein danáká ákona inin kaúden oriyaren ída mana yaná baran o furen mifo mai ma iyáantan danasinta ano nentá bákan para ódaren amusin mana uanten mino. Máan ma iyan mi ena vara finté toya nanin banta anon ma varafin e varé tiféuno sen inen mino. ¹⁴Máan baya ma siyain nanin banta ano mai vetíi varu anaí ma uren ban nain bara van mi inin onan kaúkaren mino. ¹⁵Betí ankan ma erikhá ein bara van máa sen baren mai ma erikháeipá kasaen evaránen orin nainten mino. ¹⁶Máan tin nainten mifo inarufá ma moéken kama ukhan ma mató baru vain nan mi vetíi inin onan kaúden oriyaren mino. Máan tiyáken mi Tiyaarafenun nan ída ayave inton betíi Ayarafenu e sen ariyaren mino. Mai fara vara ino. Béi anon betíi kákan baru útaádan inarufá ban mino.

¹⁷ⁱTiyaarafenu ano ma Abaraamun akhenóka uan onan maen béimpin mumunan baré íkan mi Aisakin íkun uan béin ameno van en mino. Tiyaarafenu ano ma Abaraamun iyáantan baré ein danasinta mantaren mi auuanon táke iyampon Aisakin íkun uan ameno van en mino. ¹⁸Tiyaarafenu ano véin iyáan tiyáken máa sikharen mino, “En anin Aisakin ará pintéi en ana akhá afoká inten mino.” *Esé 21:12*

¹⁹^jTiyaarafenu ano fúká ein kéká evaránen avían mantiyain bantin Aisaki ma fúbintin maen evaránen avían mantanten ne sen Abaraamu inikharen mi furin pinte ve akhá evaránen aviren mino.

Aisaki Yekopu Yosepi Nénei Mumunan In Baya Ino

²⁰^kÍnaimpáké ma Tiyaarafenu ano ma Yekopun nú Ison núi vampin ma maman afokáin nain avúava san Aisaki fura sen iníden mumunan iyáken mi maíkan iyampon avu amen mino.

²¹^lYekopu ma ayokhuviníen purono van iyáken ma varampin mana vakhen ban ma monó tiyan maen mumunan iyan mi Yosepin anin kanan avu amirú en mino.

^f 11:11 Esé 18:11-14; 21:2; Rom 4:19 ^g 11:12 Esé 15:5; 22:17 ^h 11:13 Esé 23:4; 1Kr 29:15; Íbo 39:12; 1Pi 2:11 ⁱ 11:17-18 Esé 22:1-14 ^j 11:19 Rom 4:17 ^k 11:20 Esé 27:27-29, 39-40 ^l 11:21 Esé 47:31-48:20

22 ^mInká Yosepi ma furono van iyáken maen mumunan iyan mi máa sen ákona vaya siamikharen mino. Isipíke ma Tiýarafenu ano Isareri nanin banta yo aviren orinti sen tiyampa kayo vasá bare orono.

Mosesini Mumunan In Baya Ino

23 ⁿMosesin anóe afóe ano mumunan iyáken mi véin ma kaúden kanú manaú biyontá béin aúpá aúmamádan baren mino. Tiýarafenu ano enará ukhein iýampon mi míkanan amikhan pasen kin mano inte avúavasá bariyan nafi mai van ída feren mino.

24 Mosesi ma e anoní iyáken béimpin mumunan bákan mi véin nan ída kin Feron araun anin ne sen arano van inikharen mino. 25 Umei amusin mano ma ainen mo kípé iyain pinté me ifá uren mi Tiýarafenui vanasi ano ma variyain uman barano van inikharen mino. 26 Béi ma inikhá ein mai Yisas Karaisin naro siren ma uman baran mi kama ukhen mifo Isipíkена kama yanasintará ma o ánoní inan ída inikharen mino. Mai fara va ino. Mai ma Tiýarafenu ano moékakhein miyan ma amin nain nan mi inin onan kaúkaren mino. 27 Mosesi ano mumunan mái váken kin nan ída feranton Isipí bara me ampíren oren mino. Oriyákan ara uman mano ayanafá afoká iyan mifo mai ma aúpá bain Tiýarafenurái inin onan kaúdáken mi oren mino. 28 ^oIsareri kéká ano Avo uantan avúaváká dafíben ona yaará nare féðantin aruan ma furin enisori ano vetfi esé kena ain iýampon ída arino van Mosesi ano mumunan iyáken betin ákonaen baya siamen mino.

Isareri Nanin Bantai Mumunan In Baya Ino

29 ^pIsareri nanin banta ano mumunan iyáken mi Nararé Non ne ma siyain un non aúbaná pe ukhein barará ma oreiníen ena ufá e kháden ódivin mi Isipi kéká ano vetin ánain dakhafen oriyaren minó ano non ufuren puren mino.

30 ^qIsareri kéká ano mumunan iyáken mi yan manápá ifo afápá kan un kádan damú ma Yerikó baru eúkiyain má kafi ma uvantá ein mano un baráken eraven mino.

31 ^rPamúku nanin Reapi ano mumunan ukharen mi mai ma vei varu ráke nanin banta ano ma Tiýarafenui vaya átakharé iyaren ma fureimpin béi ída furen mino. Mai fara va ino. Mai ma afurin bantá kan ma aronái uren avían aúmanantáká eintá ino.

32 ^sMáan tukharen mifo mai inte vaya kayó ena vantirá tiamentera funo. Mai ma Kidioni fi Baraki fi Samonsoni fi Yefta fi Deviti fi Samueri fi áa inká sakhanampa vanta kayo fi ma mumunan iyá ein baya kayo

^m 11:22 Esé 50:24-25; Eks 13:19 ⁿ 11:23 Eks 1:22; 2:2 ^o 11:28 Eks 12:21-30

^p 11:29 Eks 14:21-31 ^q 11:30 Yos 6:12-21 ^r 11:31 Yos 2:1-21; 6:21-25; Yem 2:25

^s 11:32 Ano 6:11-8:32; 4:6-5:31; 11:1-12:7; 13:2-16:31; 1Sa 16:1-1Ki 2:11; 1Sa 1:1-25:1

mai van mifo ída afokhan bain ída siamenté uno. ³³“Mai vanta kayofin mi mumunan bákan ída ma kamaen dafisein kamanin kayo maman bararasí uren puntákein avúavá póké banasi aviren oriyaren mi mai ma Tiyarafenu ano iyáantan baré ein daná o varen mino. Mai kéká anon raioni kayo oorá páken mi ³⁴“ira ma varúten kiyá eimpin dusimiyáken inká baenatifó ma aruan purono van iyan maen aúpa karan noren mino. Betimpin ma ákona ída varé ein maí damú anan ákona mamaren namuro aren dakhafin karan orera iyaren mino. ³⁵“Anasi arinta ano vetí kéká ma fúká ein pinte evaránen oniyaren mino. Oniyákan manáa kéká aruren betin amaniná ara ara uman kaiyan mifo Tiyarafenurá mumunan iyáken mi furin nan peden ma véin me oyan amiren ma kamaen ban nan ída inen mino. Mai ma fúkaren ma ínaimpáké evaránen e mantaaren ma kamaen amusin pinté o van nain nan mi vetí ákona inin kaiyaren mino. ³⁶“Manáa kéká máká maáká uren ayankun dafiyó pó ankáden au yo yavarava fiyan inká ena kéká seni anampó amempin kuren karavusi namumpin mo kaiyaren mino. ³⁷“Manáa kéká onámanápó ankamádan puriyákan manáa sofó aúbán dana siyáken inká manáa vaenatifó tíka sáka in puren mino. Máan tiyákan manáa kéká ano sipisipi au fi memé au fi yo siren maen aúf danasí uren arafan nóken kákan uman bariyaren mino. ³⁸Máan tiyáken mai kéká ano vanta ída van kámá barafa safi anuyon pimpa safi yon aimpin nafi inká bara aimpin nafi aúmanen noren mino. Mai kéká ma varyiá ein avúavá ano varará nanin bantai avúavá esantakhen mino.

³⁹Mai ma siaméku ineona kéká ano mumunan eintái mai uman barákan Tiyarafenu ano kanaíene sen mifo mai ma iyáantan baré ein danasinta fura sen ída manten mino. ⁴⁰Mai fara vara seyo, mai ma vetin ameno siren ma iyáantan bain daná mai moéken kama yanái Tiyarafenui ineinefin bain tetin má ma mai yoran dóan kíparékun maen manápasíen mi mai miyan timinten mino.

Yisasintá Ana Ma Inin Onan Kaúden Ban Ma Ventá Mumunan In Baya Ino

12 ¹“Máan tukhan mai nanin bantai ákona mumunan mano ma setin aní ukhein manon iyaren eúkukhen mino. Máan tukhein nan mi namu avúava sinta ano ma setinti aasá iyariyan ma fákaan ákona inain mai ume yanasá karúdaré mai ma Tiyarafenu ano yóde vá barano ma sikhein daná tiyampa é tava uresá o vará tifano. ²Yisasi ma setisi mumunan ana vain ná kakhábé tifékun ná tiviren orino. Béin arono siren ara ara uman ben amaniná kaúden ankayanten aufen akhare siyákan

¹ 11:33 Dan 6:1-27 ² 11:34 Dan 3:23-27 ³ 11:35 1Ki 17:17-24; 2Ki 4:25-37 ⁴ 11:36 1Ki 22:26-27; Yer 20:2; 37:15; 38:6 ⁵ 11:37 2Kr 24:21 ⁶ 12:1 1Ko 9:24-25

Tiyarafenu oo yaiyen daa unkamádantá ayave furiríen mino. Máan ten mifo amusin danasinta vákan mai varano van mi máan turen Tiyarafenui ayan kurompá kin karáká kumanten mino. ³Ume nanin banta ano ma véin amaniná ída funtákein avúavasí ein nará ovare me inesin ná mai ano ída avesara aminti vá oyan ameno.

Tiyarafenu Ano Ma Ve Akhafana Funtarano Van Uman Amein Baya Ino

⁴Ume avúavá bá ma aruvimpin mana ano ída fureya ei nare vanakha ono.

⁵^zTe sikhafana ono ma sen ákona uantákaré ein baya áunta fono. Béi máa sikhén mino.

“Te sanin noe, Bafan mano ma man baya siamintiya mai éin mi funtariyan mifo

ída vá inian namu uantáde vá tisiyá uno sire ará namu ono.

⁶Mai fara vara seyo, Bafan mano ma anunu ukhein kékái man bayafó puntariyáken

inká te sikhafana e ma siyain kékái yafiyosí uren ankamé iyan mino.

Pro 3:11-12

⁷^aTiyarafenu ano ve akhasí urá bátifé umpo uman ma variyá tiferuna vará béi anon man bayafó tetin puntariyan ne vá té tifano. Iye anó man bayafó be akhafana ída funtare ne siyá inikhe fono. ⁸Tiyarafenu ano ve akhafana funtaré iyan mifo onesin ma siretin aúban ma mai avúavá ída vantí vá mai afova sá ono. Tiretí ankan ída ven akhafana ompo aasá iyampon mi vaonon tikhen mino. ⁹Bararáke sífóeyan mano ma setin puntará maé betíi vaya iné iyá tifé umpo inté urerá inaru fáke Sífóen oo yaiyé ben aránaópá oriyará para vá tifante rafuno.

¹⁰Tetin tifóeyan mano ma inin ma kama ukhein avúavá máan tanáa oranará tetin puntaré iyan mifo setisi kama avúava san mi Tiyarafenu ano funtaré iyain mino. Mai fara vara ino. Bei kantasí ukhein avúavá barano van mino.

¹¹^bPuntáden ban man baya ma siamiyantiya ída amusin inompo uman manan baran nono. Máan tukharen maen mai avúavá ma afová ukhein kéká anon ínaimpáké kama yunan ma yuyaseinén kama khumanin o yosé iyan mino.

¹²^cMáan tukhein nará mai ma avíkiyain ayan puríkiya vá inká mai ma antu antu iyain arantantasá mantaan ákona ono. ¹³^dE arantan ma orin nain aa vá aní ure kama uresin ná ai ayan ma namu ukhein kéká ano ma en dakhafinten maen ída e yupóen ankaminten mifo evaránen kama inten mino.

Tiyarafenui Vaya Ma Átakharé Iyaí Páke Ma Sikhén Baya Ino

¹⁴Banasi vá ma ará kusen ban má inká avusese en kantasí ukhen ma van avúavá basá ákona e varano. Para vara seyo, ída ma kantasí

^z 12:5-6 Yop 5:17; Rev 3:19 ^a 12:7 Diu 8:5 ^b 12:11 Yem 3:17-18 ^c 12:12 Ais 35:3

^d 12:13 Pro 4:26

ukhein kéká ano ída kanaíen Bafan onanten mino. ¹⁵Tiretí ankan pinté mana ano íta yaa aran ma imá deiní esin manáa ano eraven ankamen Tiyaarafenui sarisari ída varanafo yafian ná ákona ono. ¹⁶eMana ano famúku avúavá iyá intin pefá ma Iso ano Tiyaarafenu oyan amiren ma vei esé iyampon bí ma sító dunantá ma amíyan bareiní inafó yafían ná ákona oro. ¹⁷Máan turákaren ínaimpáké mai avu evaránen barano van en mifo ída kanaíen mino. Mireníen aran íta uan amiyákan ifí den mifo evaránen ma sirun noe siren ma mai avu varampin ída kanaíen mino.

Inarufá Bain Yerusaremi Ádé Inká Ore Ono Ma Sein Baya Ino

¹⁸gMai ma Saináí anu yompin kákan ira khiyákan títípa ukhan ma kákan uva uaren baékon uniyan ma Tiyaarafenu ano Isareri kéká ma vei man baya ameintá ída orikha rono. ¹⁹hMai fara vara seyo, ufen mano kákantá asin maen Tiyaarafenu ano vetin má baya síkan akhokho van uaren ben nan tesin ída setin má baya sino sen mino. ²⁰Máa síkan Tiyaarafenu ano vetin tiantan e afánen manáa nentá oriyákan temí, “Mana safúna ano ma anuyon me aruvinti vá onámanápó ankamesin ná purino.” *Eks 19:12-13*

²¹Mai avúavá ano Mosesin akhokho amíkan béi máa semí, “Téin tivinantan den tikhokho fiyá uno.” *Diu 9:19*

²²Máa síkan maen Saioní anu yontá ma ayun para vain Tiyaarafenui auyen Yerusaremi baru ma inarufá baintá inka ere ono. Kokhon tausení enisori kayo ano ma kéká ukhen amusin iyaimpin mi e va ono. ²³Tiyaarafenui eséke iyampon kayo ma inarufá aví uvantá ein kékái átarufin mi ere ono. Mai ma minó nanin bantai avúavá ma yaimin nain Tiyaarafenu vá inká banasi ma evaránen avíden ma maman kama uádiyain Aunan kayo vá ²⁴iInká Tiyaarafenu vá barará nanin banta vá aúban ma váken auyen kasen bani man baya ma maman ákona uantan banta Yisasin má baípái ere ono. Eborini nare ano ma fefá berai siyan ma anona vá uman ameno ma seiníen beni nare ano ída máa sinten mifo moékan tarisari uren ma ume arúantan nare vaípái ere ono.

Tiyaarafenui Vaya Ma Ída Átakharé In Baya Ino

²⁵jTiyaarafenu ano ma siretin tiamiyain baya vá inireya mai ánain bákurono. Mai fara vara seyo, fefá ma ma vara ráke vanta Mosesi ano ma vaya varen oríkan ma Isareri nanin banta ano átakharé uren maen uman barein mino. Máan tein mifo inaru fáké ma vaya siyain banta avaya ma ída iné tifanté mai inté ukhein uman ná bará tifante rafuno.

^e 12:16 Esé 25:29-34 ^f 12:17 Esé 27:30-40 ^g 12:18 Eks 19:16-20; Diu 4:11-12

^h 12:19 Eks 20:18-21; Diu 5:22-27 ⁱ 12:24 Esé 4:10; Ibu 8:6 ^j 12:25 Ibu 2:1-3; 10:26-29

²⁶Tiyarafenu ano ma Sainaí anu yontá ma vaya síkan maen bara vái khayaen mifo saréa ma sian damuádan ma vain mai máan mi sikhen mino. “Enádá ma vaya sékun maen minan ayon má bara vái antu antu inten mino.” *Aka 2:6*

²⁷Máan ma sikhein mai minan ayontáke yanasinta vá ma varáke yanasinta vá ano kípanten mifo inaruráke yanasinta ano fara vanten mino.

²⁸Máan tin nain nan mi mai ma ída namuin baru ma variyá tiferá Tiyarafenu van pédé béin tusu siantádé amusin amerá bentá ana monó té tifano. ²⁹^kMai fara vara seyo, Tiyarafenu maen afá iran báken minó danái kaan kaurinten mino. *Diu 4:24*

Kípan Baya Ino

13 ¹Ena vá ma ará amin maran in avúava sá para fákaresin bano. ²Ena fáke vanta ma aviren mápín mo khaúden kama uantan aváuvá ída vá áun nono. Mai fara vara seyo, fefá ma mai avúavá ma variyá ein kéká ano ída afová inton enisori kayo aya ukharen mino. ³Karavusifin ma vain kékasará ineine iyáke vá beti ma variyain uman bariya vá inká manáa ano ma ena kéká uman amiyanti mae mai ma variyain uman ná ayaeya varano.

⁴^mÁbasuí impín áesin ná puntákanti vá míkanan mano ven oo yaiyin maran iya vá ben nan anunu in maran ono. Ena nanin banta vá ma kiyáfo maran en inká ena ana safi avafun nafi ma varen asuse en noin kéká Tiyarafenu ano yaíden kó tiantanten mino.

⁵ⁿMoni san ma anunuin avúava sará periyáke vá mai ma yákeona máa vará kanaí ukhé uno seno. Mai fara vara seyo, Tiyarafenu ano máa sikhen mino,

“Ída uron mi éin me ampiré nentá oré inká
ída uron mi éin táunonté uno.”

Diu 31:6, 8

⁶Máa sikhein nan mi setí ankan ída feran kasaé máa sen té uno.

“Bafan mano séin tiyain bantan bantí mai van ída feranté uno.

Barará banta ano sen timaniná náisá intéi vae.”

Íbo 118:6

Yisas Karaisini Avúavá Ano Fefa Safi Saréa Fi Áa Ena Ena Yamu Safi Mai Manaí Anan Ukhén Banten Mino

⁷^oEi yafisin banta kayo ano ma Tiyarafenuí vaya sikhá ein nará ovare me ineno. Betin pinté ma kama avúavá erikhein nará iniyáke vá beti ma iyainí e vá Bafantá mumunan ono.

^k 12:29 Diu 9:3 ^l 13:2 Esé 18:1-8; 19:1-3; Rom 12:13 ^m 13:4 Efe 5:5 ⁿ 13:5 Yos 1:5
^o 13:7 1Ko 4:16

⁸Yisas Karaisini avúavá ano fefa safi saréa fi áa ena ena yamu safi mai manái anan ukhen banten mino. ⁹Máan tukhanti ída vá áesin ná ara ara kampun afova ma amin mano siretí ineine máden asuse ino. Tiya rafenui enará ukhein tarisari anon tiretí monó tin avúavá ákona uanté iyan mifo yunantá ma are ukhein man baya finté ída erikhen mino. Máan tukhan mai ánain ma vákurein kéká ída aya ukharen mino.

¹⁰Monó ánon banta kayo ano ída kanaíen arata yaró ma kaiyain dunan nanten mino. ¹¹Ume ampiantano siren maen monó ánon banta kayoi ánon banta anon tafúna kayoi nare varen mi Moéken ma Kantasí Ukhein Karafarampin ódiyaren mifo mai safúna kayo au varufái ira saman kauriyaren mino. ¹²Máan tiyaréin mi inká Yisasin má dere vanasi maman kantasí ono siren kákan barui yafu ona akhempá bei nare vanaen mino. ¹³Máan tukhein nan mi erí baru akhempá aravuvé mai ma véi ayave vareiní é bará tifano. ¹⁴Mai fara vara seyo, ma vara maen mai ída setisi mató baru ifo inarufá ma kákan baru váken ída erikhein nan mi yosiyá tiféuno.

¹⁵Yisasini siyain tasá tetisi monó tin avúavápó ena ena Tiya rafenun íkun uan amiyá beni kakhakhen puntákein bí tian dákó ó tifano.

¹⁶Manáa yana san ma o afasí iyain kéká ma kama uren ma e ina yaná ma avarí in avúavá ída vá áun nono. Para vara seyo, mai avúavá anon Tiya rafenun moéken amusin amé iyan mino.

Kípan Baya Ino

¹⁷Tiretí monó tin avúaváká ma yafíkein ayafa kayo ano ma siamin nainisá oro. Tiretí aú bukhafa ma maman puntáantan doran mi vetí yoran bákan inká mai yorará ma iyáin nain mai vetí anon Tiya rafenun tiaminten mino. Betin oo yayiesin ná ída arunaná bá doren ná amusin masá dorano. Mai fara vara seyo, ída ma amusin pinté doriyá inti mae ída uron mi siretin aya inten mino.

¹⁸Tetisi ineine kama ukhá inká ena ena yamú kama avúavá ana varano van iniyá umpo Tiya rafenun amúkuan amesin ná tetin tiya ino. ¹⁹Téin nan amúku sintesin ná ainen aaí intirá tiretí ankan baonafá orono.

²⁰⁻²¹Máan tukhein nará mai ma kusin amin Tiya rafenu ano ma setisi Bafan Yisasin ma masí pinte orun avían mantein mano vá mai ma veni anunu ánain dakhafono van ma iyaona vá ákona uantano. Béin ma amusin ameren avúavasá Yisas Karaisini ákona finté uaren ná tiretimpin dákó ino. Yisas Karaisi maen sipisipirá dafisin bantan báken bei nare

^p 13:9 Rom 14:17 ^q 13:11 Riv 16:27 ^r 13:12 Yon 19:17 ^s 13:13 Ibu 12:2 ^t 13:14 Ibu 11:10, 16; 12:22 ^u 13:15 Íbo 50:14, 23 ^v 13:16 Fir 4:18 ^w 13:17 1Te 5:12 ^x 13:18 Apo 24:16; 2Ko 1:12 ^y 13:20 Yer 32:40; Isi 37:26; 1Pi 2:25

vanaren auyen kasen ban man bayan ákonte ukhen mifo ena ena vá bérin aví daní iyáke vá kákan bí ameno. Pura ino.

²² Mumunan tiyofi sífá tiváeyan noe, ma ma asíka vompon ma uvaman ameruna finte vá kama e inire afová ono.

²³ Tetí ankan tifá tiváe Timotin inka karavusi fintena útúantan bain ainen ma erintí maé avíaré tiretin o onano van oronté uno.

²⁴ Tiretí ankani yafisin kéká bá mumunan nanin banta kayo vasá tenti ará kusin baya siameno. Itarí ma vain monó nanin banta ano ará kusin baya siádan tiretí ankan baonafá oren mino.

²⁵ Tiyarafenui sarisari ano vá tiretin má bano.